

09. oktober

UKA2018/186

Uunga siunnersuut: Avatangiisinut Aningaasaateqarfik pillugu Inatsisartut inatsisaat nr. xx, xx. xxx 2018-imeersoq.

Naalakkersuisut avatangiisinut aningaasaateqarfik pillugu inatsisartut inatsisissaattut siunnersuummik saqqummiussineranut qujavugut.

Siumumi pinngortitap eqqiluitsuunissaa aammalu ataqquilluinnarlugu inuuffiginissaa pingaartilluinnagaraarput.

Siumut sunniuteqartumik suleqataaniarpoq, nunap avatangiisittalu tamarmiusup paarilluarneqarnissaanut, taamaaliornikkut inuiaqatigiit ineriartornerat, inuit inuunerminni atugaat ataqquillugit, imminut nammassinaasumik tunngaveqarluni pisinnaaq-qullugu, aammalu nunatsinni uumasut nunallu naatitaqarsinnaassusia piujuaanaqqullugit.

Naalakkersuisut saqqummiussa, avatangiisinut aningaasaateqarfik nutaajunngilaq. Ajornartorsiutaasarsimavorli qanoq iliornikkut avatangiisinut aningaasaateqarfiup aningaasanik immerneqarnissaa. Tamanna pillugu naalakkersuisut matumuuna saqqummiussinerat Siumumiit nuannaarutigigatsigu oqaatigissavarput.

Ingerlaavartumik avatangiisinut innarlitsaaliinissaq Siumup pingaartitaraa. Taamaattumik uuma inatsisissap siunertaa; ikuallaaviit, anartarfiit aammalu eqqakkanik inissiisarnerup pimoorunnerullugu ingerlanneqarlernissaa ilaleratsigit oqaatigissavarput. Ilaatigut maluginiarparput mootorit atorunnaartut innarliisussaajunnaarlugit suliarineqartarnissaa qulakkeerniarlugu naalakkersuisut oqaaseqaateqartut. Mineq-qunngearput ullutsinni nunatsinni ajugaajartortut, biilit batteritortut aammalu nukissiutit allat, batteeriisa atorsinnaajunnaarnissaannut suliareqqiinissamik pilersarusiornissat aallartisareerneqartariaqartut.

Siumumiit kissaatigaarput akitsuusersuuniaannarluni akitsuusersuisoqartannginnissaa. Taamaattumik inuit toqqaannartumik sutigut eqqugaanissaa Ataatsimiitsitaliamut ingerlatitseqqinnitsigit paaserusupparput.

Siumumiit ilanngullugu Naalakkersuisunut kaammattuutigissuarput aningaasaateqarfiup atorluarneqarnissaa pisariaqarmat atuinissamut aporfilersuisoqannginnissaa isumageqqullugu aammalu aningaasaateqarfiup Nunatsinni issittumiinnera eqqarsaatigalugu Nunanit allaniit aningaasaliiffigineqarsinnaanissaa ilanngullugu misissoqqussavarput.

Aammalu Inoqarfinni eqqakkanik ikuallaqqusaannginneq attuummat eqqangarpas-suillu maaniinaq katersorneqartarnerat mingutitsimmat Naalakkersuisunbut

kaammattuutigissuarput inoqarfinni tamani eqqakkanik ikuallagassanik isumannaatsumik paarsinissaq poortuisarnissaq aqutissiuuteqqullugu.

Naggataatigut oqaatigissavara, Siumumiit innuttaasut tamarmik ilaserigatsigit, eqqiluinnerusumik avatangiisigut peqqullugit. Qaammaasat tamarmik atorfissaqarput. Taamaattumik plastikkimik atuinerit aammalu allat mingutsitsisut atorerisa annikinnerpaaffissaaniinnissaannik sulissuteqaqataaqqullusi.

Taama oqaaseqarluta Avatangiisinut aningaasaateqarfik pillugu inatsisartut inatsisissaattut siunnersuut sukumiisumik inatsisartut Avatangiisinut ataatsimiitsitaliaannut suliarineqarnissaa innersuussutigaarput.

Oqallilluarisilu

Mala Høy Kuko, Siumut